

# In Puter occupa prest la professura rumantscha

Ier ha l'Universitad da Turitg communitgà la tscherna

■ **(anr/vi) A partir da l'avust 2018 lavura Rico Valär sco nov professor per litteratura e cultura rumantscha a l'Universitad da Turitg. El cumenza cun l'instrucziun gia il proxim semester e porchia in seminari davart «manifests rumantschs». Il glindesdi ha il cussegl da l'universitad elegi uffizialmain il successur da Clà Riatsch ed ier han ins communitgà sia tscherna. Valär lavura da preschent anc tar la confederaziun nua ch'el s'occupa dapi dus onns da la participaziun culturala.**

## Tschecca glista da publicaziuns

Valär ha 36 onns ed è creschì si a Zuoz. Il 2007 ha el terminà ses licenziat da romanistica a Turitg ed ha suenter fatg in studi supplementar da management cultural a Basilea. Sia dissertaziun davart il moviment rumantsch ha el concludì cun ina summa cum laude.

Il 2010 ha il Ladin cumenzà tar la confederaziun sco translatur en la chanzlia federala e trais onns pli tard ha el midà en l'uffizi da cultura nua ch'el è l'emprim stà responsabel per dumondas cultural-politicas u per la statistica da cultura. L'onn passà ha el surpiglià il post per la participaziun culturala nua ch'el sa fatschenta tranter auter cun il program «giuventetgna e musica» u cun l'organiziun da grondas occurrenzas culturalas.

En ses curriculum cumparan plirs engaschaments culturals. Sper studi e professiun ha Valär gidà plirs onns tschorv sin viadis u en curs da teater e computer. Sco statist è el sa participà en tocs da l'opera da Turitg u dal teater Postremise a Cuir. En la Televisiun Rumantscha

moderescha el en Cuntrasts mintgamai discurs cun persunalitads da la politica e cultura.

Il novelegi po gia demussar ina tschecca glista da recensius e d'artitgels, tant scientifics sco populars, en differents organs. En furma da cudesch è cumparida il 2013 sia lavur da dissertaziun sut il titel «Weder Italiener noch Deutsche!». Plinavant ha el edì cun «Filistuccas e fanoias da temp vegl» in cudesch che cuntogna las emprimas registraziuns rumantschas ch'ins aveva fatg il 1926 cun in apparat fonografic.

## Far reclama per novs students

Malgrà ch'il nov professor entra en uffizi pir l'avust pon studentas e students tuttina visitar prelecziuns rumantschas en il semester da primavaira. Sper il seminari da «manifests rumantschs» datti per exempel ina prelecziun da la docenta *Barbara Cuffaro* davart intertextualitad en la litteratura rumantscha.

Cun in flyer fan las universitads da Turitg e Friburg reclama per il studi da rumantsch. Ils students possian scuvrir ils idioms, perscrutar la lingua da whats-app u atgnas tematicas, stat scrit sin il flyer. In studi da rumantsch pussibileschia bunas schanzas per plazzas en l'instrucziun, en ils schurnalissem, tar la Lia Rumantscha, il Dicziunari Rumantsch Grischun u en l'administraziun chantunala u federala.

Il professor partent Clà Riatsch tegna sia prelecziun da cumià ils 21 da december a las 18.15 en la stanza D31 dal seminari per romanistica en la Zürichbergstrasse 8.



Ils students da rumantsch na ston betg interromper il studi a Turitg. Era sch'il nov professor cumenza pir l'avust vegnan tuttina purschidas prelecziuns rumantschas gia durant il semester da primavaira.